

تحت السرير

حكايات وبورتريهات بالعامية

اسم الكتاب: تحت السرير
تأليف: إيناس حليم
رقم الإيداع: 7900 \ 2014
الترقيم الدولي: 1-60-6376-977-978

* * *

إشراف عام:
محمد جميل صبري
نيفين التهامي

© جميع الحقوق محفوظة، وأي اقتباس أو إعادة طبع أو نشر في أي صورة كانت ورقية أو إلكترونية أو بأية وسيلة سمعية أو بصرية دون إذن كتابي من المؤلف؛ يعرض صاحبه للمساءلة القانونية.

داركيان للنشر والتوزيع – 22 ش الشهيد الحي بجوار مترو أم المصريين – الهرم
محمول: 01005248794 – 01001872290 – أرضي: 0235688678
www.kayanpublishing.com – info@kayanpublishing.com

تحت السرير إيناس حليم

حكايات وبورتريهات بالعامية

إهداء

إلى روح خالتي «كاميليا»
وكل اللي عاشوا حياتهم يخطوا العسل ع السمك..

شكرًا

لـ نهلة عبد الشافي،
حضانها وبيتها وحواديتها...

شكرًا لكل من:

كريم أبو ريذة، الشيماء حامد، حكيم أبوكيلة، زينب فرحات،
غادة خليفة، أسماء الشيخ، هشام أصلان، هبة خميس، ستوديو
جناكليس وكل من ساهم في إتمام هذا العمل.

طَبَقِ الحِنَّةَ

مخدتش من الهنا غير حرفين من اسمي..
أشم ريحته،أخطي فوقيه لكن ملمسوش..
«العادب ينطب والمالح ينكب»
- هو أنا عدبة يا ستي؟
-انتي كراميلا..

ستي كانت أكثر واحدة بتتفائل بيها البيوت في النوبة.. يجييوها
في الأفراح تزغرد وتبخر العرسان وتُصَبِّلهم اللبن بالسكر.. العروسة
ترش اللبن على وش العريس وهو يَـكُـب البلح على طرحتها..
وأنا دائما كنت ببقى واقفة في ديل ستي، أمسك السلة الي فيها
الشعرية وقوالب السكر، أتفرج ع العريس من بعيد وهو بيلبس
الأسورة الحرير وأمه بتحط الصندل على راسه..
مكنتش بحب أبص في وش العروسة! مع إني لما كبرت مفيش
عروسة في البلد ملاقتينيش جنب جناحها..

شجرة مريم قريبة من بيتنا.. أنا والبنات اتعودنا نكتب الي
نفسنا فيه في ورق، نطبقه ونعلقه بمشابك غسيل على فروعها..
ستي كانت بتقول لازم من وقت للتاني نصوم عن أكثر حاجة
بنحبها.. زمان كنت بصوم عن النبق..
مع إنه مُر، بس كنت بحبه.
مبقتش أحب أي حاجة مُرة..

دلوقتى فى عز صيامى بطلع سطوح بيتنا.. أخلط الحنة وأعجنها
بمية الورد، أزين الشموع بشرايط الذهب وأزرعهم فى الطبق.
العروسة فى ليلتها بتبقى بدر.. وأنا بحب أحنى رجلين الصبايا..
لما بتروّج باخد طبق الحنة وأقفل على نفسى الأوضة فى الضلمة،
أولع شمعة شمعة وأحنى رجلىا..
أغرسها كلها فى الطبق وأغنى....

ستى لما ماتت كل واحدة من بنات العيلة خدت من دولابها
حاجة: اللى خدت شالها واللى خدت مكحلته، واللى طلعت
طقم كاسات فرحها من تحت السرير...
أنا عيني كانت على دلالة ذهب دايمًا قريية من صدرها، عزت
عليا نفسى أطلبها..
هى كانت قشرة بس عليها اسم ربنا..
قبل ما تموت كانت حاطه كف مريم فى برطمان إزاز ملياه ميه
وساندة بيه باب أوضتها.. أخذته حطيته تحت سريري.. أنا عارفة
إن كفها طيب هيطبطب عليا وقت ما أحتاحه.. وأنا مش طالبة
يا ستنا غير شاب حسن.. كتفه حنين وجبينه باصص للسما..

أول الشتا ورقنا المطبق بيطير مع الهوا..
نستنى الصيف عشان نعلق ورق جديد...

تحت السرير

أنا عارف إني غلطت، بس والله ما كان قصدي..
من سنتين كانوا بيبقوا نقطتين ثلاثة بس، مكانوش بيعملوا مشكلة
زي اليومين دول.. و «أم أحمد» مكانتش بتحب تحسني بحاجة..
علشان هي بنت أصول،
أصل بنات الأصول دول عاملين زي القطن، أبيض ويفرح القلب..
بس ياريته فضل.

الألبومات الكبيرة اللي تحت السرير كان جواهرهم صور من أيام ما
«أحمد» كان بالكافولة..
الواد ده وحشني أوي، من يوم ما سافر والبيت مبقالوش طعم،
الله يلعن أبو الظروف اللي خلت الولاد تلاقي خيرها في بلد
غيرها..

مكنش قصدي أبوظهم، بس أنا برضه حاولت أعمل أي حاجة،
مسكت كل ألبوم وطلعت منه الصور اللي لسه متبهدلتش، رصيتهم
كلهم في ألبوم واحد وحطيته تحت مخدي، ولما «أم أحمد» خدته
مني وحطته فوق الدولاب عشان مطولوش.. مزعلتش منها، هي
معاها حق برضه.

صوت عصاية المنجد وهي بتضرب في القطن بتفكرني بأيام حلوة..
حلوة أوي..

أيام ما أجرت الجراج من الحج «كمال» عشان نوجد شوار «أم أحمد».

من فرحتها نجدت سبع تر لحفة وست مخدات ومرتبين، أصلنا مكنش معانا فلوس نوجد ساعة جوازنا غير لحاف واحد ومرتبة.. بس كانت علو كدة وتفرد أجدها زهر، مكنتش فطسانة زي يوميهـا..

«أم أحمد» بقالها فترة بتحلم إن زهرها واجعها.. هي مكانتش عايزة تقولي بس أنا جرجرتها في الكلام، أصلها هبله وعلى نيّتها.. هو صحيح هيفضل واجعها، بس الحمد لله مدام لسه متكسرش..

أنا عارف إنها متقصدهش، بس أنا صعبت علي نفسي لما لقتها بتدور على المسمع الي كانت بتفرشه تحت الواد «أحمد» وهو عيل،

وفرشته تحتي.. بعد ما نجدت المرتبة الجديدة...

نوتة زرقا

«فَلَمَنجُو»..

قادر يمشي برِجل واحدة ع الميّه رغم كل الأخرام الي في قلبه!
علشان كدة قدر يودع حبيته في المطار..
ويحب بعدها كثير..
ويكتب في آخر كل سكة
نُقطة.

«فَلَمَنجُو» ميعرفش يرقص..
لكن بالصدفة طلع صوته حلو..
سمعتة بيغني للشيخ إمام، وشفته بيوشوش أول ضفدة عملها
بورقة بيضا..
وسمعت كمان الضفدة بتوشوشه بسرّها الي فتحله باب
الحكايات.
بالصدفة أو بالمحايلة، «فَلَمَنجُو» بقى أشطر ولد بيطبق ورق.

سألته عن الدنيا.. ضحك!
قالي: شَربتها من كاسي علشان تفضل تجري ورايا..
قالي إن البنات هما مسامير القرنفل في كوباية الشاي..
وإن اسكندرية أول بنت باسها وحبها..
سألته عن القط الي جواه!
قالي: لو مكتتش لحقته كان هينط من البلكونة يقع على جدور
رقبته..

مكنتش محتاج أضرب الدنيا على دماغها..
أنا بس سبت الصدفة تلعبلي ديلها وتتحنجل..
حداشر شهر في الجيش بطبق ورق للعساكر وأعملهم الشاي،
أجيب فلافل وجرايد للظباط في الكتيبة،
كنت لوحدي..

وكنت عارف إن حلمي أثقل من المركب!
كتبت اللي نفسي أعمله في نوتة زرقا:
١- أروح فرنسا.

٢- أطلع في برنامج شبابيك مع سلمى.
٣- أعمل نجفة بالورق.

٤-.....

كل ده عملته.. بالصدفة أو بالمحايلة.
وبالصدفة أو بالمحايلة اتبسّطت.
ورُحت لأبعد من فرنسا..

«فلمنجو» معندوش مشكلة مع الحاجات اللي مبتكملش.. الحقيقة
هو اللي بيقصد ميكملهاش،
مبيحبش يوصل لآخر الحاجات،
بيحب يحوش البدايات في برطمان إزاز.. يقفله كويس بعد ما
ينهي الحكاية همزاجه، يطلعه كل ما الدنيا تضيق..
يبصله بس ميفتحوش،
علشان لو فتحه يمكن يندم..
ولو ندم، يمكن ميعرفش يوزن نفسه برجل واحدة!

«جوزيف»؟

أول واحد فتح عينا على ضحكة العيال.
العيال الي مبيسمعوش بيفهموا الحكاية أكثر من أي حد.
والعيال الي مبيشوفوش، إديهم بتحس بتنية الورقة،
التنية ساعات بتنور طريق..

الفلوس؟

حبة ورق.

«كيلوباترا»؟

صاحبتي الي دايماً مستحملاني حتى لما برمي أول شوية تبخ في
طرفها..
مبشربهاش عشان رخيصة.. بشربها عشان بحبها.

«فلمنجو» بيته مكركب..

بوسترات أفلام فرنساوي على أفيش فيلم عربي في الحمام..
صندوق «ستيلا» جنب التواليت بيسند عليه المناديل،
«لايف جاك» ورا الباب بيعلق عليه فوطته،
نجفة معمولة بطيارة ورق قديمة.. ونجفة تانية بالأوريجامي..
بوستر لـ «إيميلي بولان» على باب الشقة.

هي؟

كانت شبه «إيميلي».. وشبه الساعة البندول الي سافرت وسابتها

ع الحيلة!
فيه غنوة بتقول: أنا حبيتك ولا اخترتك
لو حبيتك مش هختارك، لو هختارك يمكن أحبك..
الحب مفيهوش قرار.
لكن السلاسل بتخنق الطير اللي بيحب يمشي برجل واحدة ع
المية..
حتى لو كانت سلاسل ورق...

حكاية الولد أبو ودان صغيرة والبنت اللي قلبها مليون حواديت

كان فيه مرة ولد جميل اتولد بودان صغيرة، كانت أصغر من ملامحه بكثير!

لما كبر حب بنت جميلة بس قلبها ثقيل. وعشان حبوا بعض أوي، لا هي أخذت بالها إن ودانه صغيرة، ولا هو كان عارف إنه هيتكعبل في حواديتها في كل مكان في البيت.

الحواديت كانت بتتگب منها على السجادة، فوق الرفوف، بتكرمش مفرش السرير، بتخبط بصوت عالي على الأطباق اللي بياكلوا فيها...

الولد أبو ودان صغيرة مكنش بيحب يتكعبل،

ومكانش بيعرف يصبر عليها لحد ما ترتب كل حدوته في مكانها..

البنت قالتله إن الحواديت منكوشة عشان مش لاقية حد يسمعها.

قالها: ملّيتها وهسمعها..

البنت لمتهم كلهم جوه صندوق كبير حطته قدامه.. ولأن ودانه

صغيرة معرفش يسمعها كويس..

نام من نص أول حدوته،

البنت الي قلبها مليان حواديت اضايقت ومحاولتش تحكيه

تاني، ولا هو طلب يسمع تاني..

جاتلها فكرة إنها تجمع كل الحواديت وتحطهم في سبت خوص

مربوط بحبل تخين وتنزله من البلكونة.. قررت توزع حواديتها

على الناس..

كل الي كان ييمر من الشارع الي فيه بيتها كان بيلقي حدوته

تندهله من جوه السَّبْت.. حدوتة على مقاسه بتغير يومه..
عم «عادل» البقال، عم «كمال» بتاع الخضار، الراجل اللي بيخبط
على الأنابيب، واللي لحن حواديتها كان يغطي على صوت صداها
في الشارع..

حتى العصافير كانت بتمسك الحواديت بمنقارها وتطير بيها لبعيد.
الحواديت كانت فرحانة إنها بتلمس السما، حتى لو وقعت تاني
على الأرض..

الحواديت بتفرح لما بتكعبل الناس،
ولما بتتفتفت لحواديت تانية تكعبل ناس تانيين..
السَّبْت كان المنقذ الموقت، الحل الأسهل لقلب البنت الثقيل.
لكن في يوم الولد أخذ البنت وسافر بيها لبلد بعيدة، البيوت
فيها مفيهاش بلكونات..
بيتها كان فيه شباك واحد..
أول حاجة عملتها لما وصلت إنها فتحت الشباك.. طلعت من
شنطة السفر السبت اللي مليون حواديت،
ملقتش قدامها غير صحرا!

الشمس حامية، والعصافير كانت بتستخبي من الشمس تحت
ضلة عتبة الشباك.. تبص ع السبت من بره، تنقر فيه وتطير..
البنت زعلت، وحواديتها رجعت مكربة جوه قلبها..
رَعَل الولد أبو ودان صغيرة كان بيكرب الحواديت اللي جواها
أكثر..

وشها دبل، وعلشان متزعلوش كانت كل يوم تصحى الصبح تزرع
وردة على خدها، وكل ما الوردة تدبل تزرع واحدة تانية. وشها

كان منور،
لكن في الحقيقة قلبها كان عجوز..
الولد أبو ودان صغيرة لما شاف كرمشة قلبها،
مكنش في ايده أكثر من طبطة...

عَمَّ "إِبْرَاهِيمُ"

- «قوم رَوِّح يا عم ابراهيم»
- «مقدرش».
- «ليه يا عم ابراهيم!»
- «لو عديت من غير ما ترضى تحرقني»..
- «هي مين؟!»
- «هي.. اللي خلتنى أتوضى باللبن!»..

عم إبراهيم كان لازم يعدي على أي طريق سبع مرات!
رايح جاي، يقف يترسم قدام الطوبة اللي عيال الحارة حطوها في
نص الطريق، ميعديش إلا لما اللي حطها هو اللي يشيلها!
يصرخ زي المجنون:
«ابن الكلب اللي حط الطوبة هو اللي يشيلها»..
«أنا عارف انه فلان ابن فلان الفلاني»..
يعيط بالدموع وينادي:
«قولوله يشيل الطوبة عشان أروِّح»..

وأنا دائماً فاكراه في الشتا. لابس جلابية لبني وعمامة كانت بيضا
قبل ما تشم من لون الدخان على قد ما شمت..
قاعد في ركن دكانه جمب بواكي المعسل، يراقب اللي رايح واللي

جاي، صوته يجلجل من فوق عتبة الباب الخشب..

«أنا أعرف الحلوين من رجليهم»

ينادي على البنات الحلوة..

وأنا كنت حلوة، وطريق عمتي بيمر من قدام عتبه..

أمر قدامه بصندلي الأحمر، أغازل الكحل الي في عيونه والتراب

الي مالي اديه، أراقبه من ورا الدخان وهو بيحط الخشب في

المنقذ.. يعاكسني ويحكي لي عن الجنية الي عشقته:

«طويلة وخمرية..

تمثال أبانوس رايح جاي سبع مرات عريان قدام دكاني..

ورد المشي الي مطوقني لحد دلوقتي!

رقبتها طويلة، عنيتها وشعرها لون البنفسج. على طرف شفايفها

حلق بيلمع، اللمعة دي أكثر حاجة كانت بتغويني وأنا في حضن

مراقي..

في نص الليل أصحى ألقاها قاعدة فوق صدري، روعي مطوقة في

حلقها ورقبتي بين رجليها الي متصلة كيف الخشب،

تقولي: انزل.. انزل يا إبراهيم بات في الدكان..»

- «ها.. وبعدين يا عم ابراهيم!؟»

«انزل في عز البرد.. أفرك ايديا وأولع المنقذ،

تهمسلي.. تقرب مني..

أشم ريحة الأبانوس في عرقها وأنا بتحشر وسط بواكي المعسل»..

الرَّحْمَةُ

أنا تخين.. وبكرش..
بس نضيف.

الصُّبح الي بيشقشق ع «الرحمة» غير الصبح الي بيدخل معايا
من بوابة «كارفور»..

محدث بيحب ينصف وساخة غيره، بس المضطر ميقدرش يقول
يع !

المضطر بيحط دماغه في عين الكابنيه لحد ما تبلعه..
ييقف على باب الحمام يسمع تريقة الناس على كرشه وهو
بيناولهم مناديل مسحوا بيها قرفهم.
مش كل الناس بتغسل اديها بعد ما تخلص،
بس أنا بعمل كدة.

«الرحمة» في بلد تانية. «الرحمة» شارع بيطل ع الزباله..
مبيسكنهاش غير الي بيشوف الدنيا من خرم بابها، وأوالي عنده
فيها محل ملك أو إيجار قديم (قهوة السعادة، كهربائي السعادة،
كوافير السعادة...)،

ومابيزورهاش غير ناس عايزة تدخل الجنة على قفانا.
يرصوا عربياتهم الشيك بسوا الزباله قبل الفطار بساعة، يوزعوا
علينا علب فل بيضا فيها سمك ورز، مكرونة وفراخ وسلطة...

كتر خيرهم!

يقولوا «سمرا» قبل ما ييجي «الرحمة» كان بنت هبله بفستان
أصفر.. هربت من أهلها لما طلعلها شنب ودقن.. اتكسفوا منها،
حبسوها، قعدت تصوت لحد ما صوتها اتنشل منها، بعد كدة
طلّقوها في الشوارع تزعق للي رايح والي جاي، وتحدف على
الناس طوب وقشرب..

كانوا بينادوها سمارة الخرسا، لحد ما ركبت عربية أجرة من
رشيد، رمتها على أول الرحمة، شغلوها في قهوة السعادة وسموها
«سمرا» الأخرس.

أنا مبقعدهش معاهم ع القهوة.. مبتفرجش على الدنيا من تلفزيون
«سمرا»..

مابنامش على مراتبهم اللي المجاري نشعت فيها،
أنا بحط مرتبتي فوق..

جيب الدش اللي بيوريهم الدنيا اللي نفسهم يشوفوها،
وأتفرج من السطوح الواطي على الخلق اللي مش شبيهي...

عُمْرُ الْخَيَْامِ

البنـت الوحـشة دايـمًا بتبـقى الخـيار الأخرى.. حتـى فى عـيون الولـد
الأسـمر الـى حبـها بعـد ما العـمر مـبقـاش فـىـه غـير حـبة سـنـين
يـدوب يـقـضـوا..

وايـه يعـنى! ما هـو كـمان الخـيار الأخرى لـى باقى مـن أـزايـز النـبـيت
فى أـوض الفـنـدق..

يـفـضـيـهم فى إـزـازة وـاحـدة ويـجـرى ع الشـط الـى النـاس بـتـصـطاد مـنـه
الكـابـوريـا.. جـمـب الفـلـل الـى لـسـه ع الطـوب الأـحـمر..
يـقـلـع مـلـط وـيـنام ع التـراب المـنـدى، يـسـتـنى الكـابـوريـا تـطـلـع مـن
الـبحـر.. تـسـرح عـلى كـل جـسـمـه.. تـزغـزغـه..

لـما بـنـقـلـع الـيـونـيـفـورم الشـيـك بـتـاع الفـنـدق بـنـبـقى نـاس تـانيـة.. بـنـبـقى
غـلابـة أـوى...

أنا خـريـجة أحـسن مـعـهد بـيـعـلم مـسـاج فى الغـردـقة. كـنت أشـطـر
واحدـة فى البـنـات الـى مـعايا، الكـابـتن كان دايـمًا يـقـولـى: يا «عـاليا»
انـتى ايـدك تـتـلف فى حـريـر!

بـس لـما جـم يـخـتـاروا بـنـات تـشـتـغل فى الفـنـدق الكـبـير.. ماخـتـارونـيش
أنا!

عـارفـين اخـتـارونـى اـمتى؟

لـما الزبـان اتـحـرشوا بـالـبنـت الحـلوة..

شـغلونـى عـشان سـمعة الفـنـدق.. عـشان مـحـدش هـيـبـص ع البـنـت
السـمـرا الوحـشة الـى جـيا مـن «سـوهاج».. مـش هـيـعـوزوا مـنـها غـير
اـديـها الـى تـتـلف فى حـريـر!

أنا قلعت الطرحة مرة. اتحايلت على «عاصي» ياخذني معاه ع الشط..

مش بس الطرحة! أنا قلعت ملط زيه. شعري كان بقاله كتير ماشمش الهوا.. كل حة في ضهري كانت محتاجة تشم الأرض المبلولة تحتها..

استنينا مع بعض الكابوريا تزغزغ كل حة في جسمنا.. كانت بتجري علينا كأننا احنا كمان الخيار الأخير اللي ملقتوش جوّه البحر..

بَصَ للسماء وقرالي بيت الشعر اللي مكتوب على إزازة البيت:

«سمعتُ صوتًا هاتفًا في السحر.. نادى من الغيب غفاة البشر

هبوا املأوا كأس المُنَى قبل أن.. تملأ كأس العمر كف القدر»^(١)

قراه بصوت عالي يوصل آخر السما. «عاصي» كان فاكر إني مش هفهمه. بس أنا فهمت.. وساعتها بس حسيت بيه.. عرفت ليه كان بيبجي الشط يدور ع اللسعة دي من وقت للتاني! لسعة اللي قلبه دق لما أول بنت حبها شاورتله من البلكونة وادتله رقم تلفونها على صوابع إديها..

هي هياها اللسعة اللي بيحسها كل ما يشوفها داخله من باب بيتها في دراع راجل غيره وجرا عيلين وراها..

البنت الوحشة كل حلمها تبقى الخيار الأول لراجل يديها أول

(١) من رباعيات الخيام

بوسة في الغواصة، يحضن إديها من أول الممشى لآخره..
لكن الولد الأسمر كان كل حلمه إنه يبقى أول واحد يفتح إزازه
نبيت..

البت الوحشة كل حلمها تبقى الخيار الأول لراجل يديها أول
بوسة في الغواصة، يحضن إديها من أول الممشى لآخره..
لكن الولد الأسمر كان كل حلمه إنه يبقى أول واحد يفتح إزازه نبيت.

دارُ القَنَا

العيد الي فات.. لأ الي قبله...
تصدقوا مش فاكرة أنا انضربت امتى!
بس فاكرة كويس مين فيهم الي ضربتني، وعشان ايه..

بيقولوا «أماثل» قبل ما تتعين مشرفة على العنبر كان عندها محل
غلة في الصعيد، بتبيع فيه سمس وقرفة وترمس مطحون وشبة
مخلوطة بمسك.. وبتبيع كمان العدس الي جاي من المدشآت..
أماثل مكاتش بتجيب عيال، هي قالتلنا كدة. لما بتكون رايقة
بتقعد تحكي وهي ماسكة كوباية الشاي في ايديها وتسرح...
كل مرة نفس الحكاية: جوزها الي مات، «فوز» وهي داخلة
عليها بالجزمة الكب كب، المنديل الحرير أبو هتاهت.. أبوها
جبرائيل الي بيطوح في عز النهار ويضرب في أمها وهي ساكنة..
اخواتها الصبيان ودكاكنهم الي مبتكسبش، اخوات جوزها الي
أخذوا محل الغلة وطردها من البيت.. شوال السمس المدلوق
ع الأرض...

كل مرة هي هياها الحكاية بس بتغير الي جوه الشوال..

أنا بيتي قريب من هنا.. ع الترام..
بس מבبش أقعد لوحدي..
من يجي عيدين ثلاثة جاتي غيبوبة السكر وملقتش حد

يلحقني، البواب كان مسافر لأهله في البلد..
بس مش ده اللي خلاني آجي هنا برجليا..
أنا جيت لما «أم صباح» ماتت، ولما مرضوش يعملوا فرشتها مقام..
قفلت البيت وبقيت أول كل شهر أقبض المعاش، أشتري شوكلاتة
وأخبئها من المشرفات في أوضة «أشجان» اللي جنب السلم..
من يوم ما جيت ورجلها اليمين في جبيرة!
وكل ما أعوز آخذ شوكلاتاية أنزلها.. وكل ما أنزلها تسمعني
قصيدة..

أنا كنت موظفة كبيرة في نقابة المهندسين.. لسه معايا الكارنيه،
ولسه بروح النادي من وقت للتاني أشرب شاي قدام البحر،
وأتفرج على بتوع البوفيه والعيال وهي بتذاكر..
أنا مش كركوبة، السكر بيهد الحيل،
وهو اللي خلا «أماثل» تضربني
«ريحة الحمام تفاح معطن!»

مرة دعيت عليها يجيلها ضربة شمس وقوت.. بس بعد كدة
زعلت من نفسي.. أصلها ساعات بتحميني وساعات بتغطيني وأنا
نايمة..

الولاد اللي بيزورونا في رمضان بيقوا زي العسل.. بيجبولنا معاهم
شيلان صوف وعصير وجوافة وبسكوت.. الحنين ع السنان..
أنا قتلهم مفيش أحن من الشوكلاتة بس محدش سأل فيا..
لو معدوش على كل السراير زمايلي يتقمصوا، وفيهم اللي بتقعد
تعيط..

أنا مبعيطش.. ولا بقعد طول النهار أحكي حكايتي وأقول شعر زي

«أشجان».. أنا أصلاً معنديش حكاية.
لا جوزي مات ولا عيالي سافروا وسابوني...
ده أنا كمان لا اتجوزت ولا جبت عيال.. أومال أمائل عملها
مناحة ليه بقى!
الولاد دول ساعات كمان بيدولنا فلوس.. زميلي مبيفرحوش بيها
زي ما هما فاكرين..
احنا بنفرح إن حد سأل علينا..
كل ما الناس تزورنا أشجان تقعد تقرا الشعر اللي كتباه لعيالها..
وساعات تقعد تغني أغاني شريفة فاضل وفايزة أحمد، بس في
الآخر برضه بتعيط..
«دوبني دوب يا هوا دوبني دوب.. ياما قلت أتوب يا هوا ما
قدرت أتوب..
آه لو يجيني منهم سلام.. يخلي جرح الشوق ينام»

أنا مش عايزة أمائل تضربني تاني..
هو العيد اللي جاي امتى؟

فَرَشَةُ "أُمِّ صَبَاحٍ"

(١) بعد الحادثة:

أنا «صباح».. البنت اللي نورت السوق بعد حداثر ولد ماتوا في
بطن أمي..

كنت قاعدة على كرسي جمبها، وشي في وش المذيع أبو نضارة،
الي قالي احكي لي حكايتك؟

وبص على رجلي اليمين، بصة الي عمره ما شاف زيها!
بصة الي عايز عنيه تتملي بالدموع وخلاص.

(٢) قبل الحادثة:

غوايش أمي تتهز ألوانها الفاقعة.. تنكش الهوا، في اديها الي
الزمن مسابش عرق إلا وحفر جمبه سكة..

رابطة شعرها بطرحة ملونة ولايسة العباية السودا الي عمري ما
حسيت إنها بتقلعها، مع كدة لا كانت بتتوسخ زيادة ولا عمري
شفتها نضيفة!

قاعدة قدام فرشتها تنادي على الخضرة النادية جوه حزمتهها..
«أخضر يا بقدونس»..

«يا بتاع المحشي يا جميل»..

«يا مجنن البنات يا بقدونس»..

«ورور يا جرجير»...

وقبل فرشة البقدونس والشبت والجرجير.. كانت في نفس المكان
عربية بطيخ..
أبويا كان يغطي البطيخ بملاية وينام جمبه ليل علشان محدش
يسرقه، في عز الحر
وعز السقعة..
وفي يوم نام مصحيش..
كُنَّا في طوبة..
وأمي شَقَّت البطيخ ووقفت في وسط الشارع تنوح:
«قتله قبلها بيوم..
طوبة هتستلفلك عشرة من أمشير تطلع جلدك نسير نسير»
«قتله قبلها بيوم..
جات طوبة ما بلت لي عرقوبة وخَلَّت الشابة كركوبة»..
«قتله قبلها بيوم.. بس هو مسمعش.. هو الي مسمعش...»

(١) بعد الحادثة:
بصيت في عينه وأنا بحكي الحكاية مش عارفة ليه!
أنا كنت بلعب حجلة مع العيال جمب الدكان، صَهرنا كان
للمرجيحة الي بتتأجر في المولد، الربع ساعة بجنيه..
ربع ساعة بس!
ربع ساعة مش كفاية عشان ألمس فيها السما يا «أم صباح»..
بس المذيع مكنش فارق معاه إني ألمس السما. المذيع جاييني أنا
وأمي عشان الناس تدمع ع الحكاية المهمة،

حكاية الرجل البلاستيك..

- كملي يا «صباح»....

«أمل» زميلتي رمت الطوبة في نص الحارة،
رحت ألحقها، حته إزاز مكسورة دخلت في رجلي،
أمي جريت بيع المستشفى..

بعد ما غطولي الجرح الدكتور نسي حته إزاز مغروسة في عظمي!
أنا في الأول محستش بحاجة من كتر البنج، بس بعدين لقيت
رجلي بتورم وتتنفخ قد حته الشام..
قالولي لازم تنقطع.. وقالولي كمان إن صوابعي هتموت وتقع
لو حدها.

هو ينفع صوابعي تموت وأنا أفضل عايشة!

-كملي يا «صباح»..

أنا لقتها بتسود وتكش زي الفاكهة المفعصة..
بعدها قطعولي رجلي وقالولي هيركبولي رجل تانية أمشي عليها..
رجل بلاستيك!

(٢) قبل الحادثة:

أمي بتلف على رجالة السوق ووخداني في ديلها.. تطلع كيس
الفلوس وتحلفهم، بعد ما تموت بينوا مكان فرشتها مقام.
والرجالة ع القهوة.. تتفرج وتضحك وتكمل لعب الدومينا..
تنادي: «عقلي أمك يا صباح».

(١) بعد الحادثة:

عنين المذيع رغرغت بالدموع..

قالي: نفسك في ايه يا صباح؟

أمي قالتله إنها معهاش حق الرجل البلاستيك.. وإن نفسي أعمل
عمرة..

بس أنا مكانش نفسي أعمل عمرة!

أنا كان نفسي ألعب حجلة مع العيال في قلب الشارع.

ونفسي أنط في قلب المرجيحة من غير ما حد يسندني.

بس ع العموم.. المذيع دمع قصاد الكاميرا..

زي ما كان عايز بالضبط.

(٣) بعد الحادثة بسنين:

أمي ماتت..

ورجالة السوق كل ما ييجوا يشيلوا الفرشة تطلع عليهم مستعمرة
حشرات!

الناس خافت لا الحشرات تتلم ع الخضار والفاكهة وتطلع البيوت..

بس بعدين شالوها.. والفرشة اتنست بأم صباح..

وأنا لبست غوايش أمي، ونقلت الفرشة برجل واحدة في قلب
سوق تاني...

سِلْمِ خَشَبِ

صباح الخير..

بقولها بأسلوبي من فوق برج الحراسة في ميدان البنوك..
«بِسْمِ اللَّهِ».. معايا رغيف بلدي وحطة جبنة بيضة.. «سيد» ابن
الجزمة جابهوملي بعد ما شال السلم من تحتي..
أنا مش زعلان من «سيد».. منا برضك بشيل السلم من تحته
بعد ما تخلص ورديتي..
كُلْنَا عبد المأمور..

أنا زعلان مِ الجبنة...
قصدي زعلان مِ الكرسي ورُكبي المتنية من قُصره..
قصدي من ريحة الصنّة في الربع متر الي مش عارف حتى أفرد
فيه سجادة صلاة..
«سيد» واد غلبان.. وأنا غلبان..

احنا اللتين مضايقين من حكاية السلم دي..
لَمَّا ببص ع الناس من فوق ببقى نفسي أقولهم يا جماعة الشعلة
مش غيتي.. أنا عارف إن الدنيا بتستعفى عالي بيستعفى عليها..
الدنيا تحب الي يسايسها ويتحنجلها..
أنا غيتي صندوق حاجة ساقعة أقعد بيه في المحطة، بالذات
الرصيف الثاني الي مودي على بحري.. نفسي أركب القطر مرة،
ياخدني للهوا بالغلط ميرجعش بيا ثاني..

كان عندنا جارة اسمها «ثريا» سابت الصعيد من زمان، اتجوزت

واد فواعلي من كفر الشيخ..
بس الواد ده مش جدع. لما جت تزور أمها قالتلنا إنها بتأخذ
قفة فيها بطتين تلاتة وتسافر اسكندرية بالقطر كل خميس..
تترجع على رصيف المحطة، تنادي عالي رايح والي جاي عشان
يشتريهم وترجع بتمنهم آخر النهار..
ثريا كانت بتحكي وهي مبسوفة! سألتها مبسوفة يا ثريا؟
قالتلي البط في القفة ونس..
مانتي بتبعيه آخر النهار يا ولية!
قالتلي هو الواحد مننا لازم يبيع الونس عشان اللقمة..
هو احنا بنبيع الونس عشان اللقمة، ولا بندور في اللقمة ع
الونس؟!
آآآآه.. لا القفة، ولا الحاجة الساقعة هاتليق على هيئة العسكري
يا «ثريا»..

«سيد» بيقول إن الحطة الضيقة بتبقى براح مع صوت الست..
بيسيبلي الراديو بتاعه أتونس بيه.. أذندن معاها بليل، والصبح
أشغل إذاعة القرآن الكريم..
جسمي يقشعر..
أروح لآخر حطة عند النيل في بلدنا،
أنزل أستحمي وأرجع كإني عريس..

لما بتخلص وردية الفجر، قبل ما أروح بفتح سوستة البنطلون
وأتصير -لمؤاخدة- ع الناس في الشارع.. بتبسط أوي لما أبّل قرعة

الرجالة وشعور البنات الي لسه خارجة من الكوافير..
وساعات باتصير على بيريه الواد «سيد» لما ييجي يستلم ورديته،
قبل ما يحطلي السلم الخشب...

سَلَا

بلكونتها كانت في الدور الأول،
في بيت كبير.. يمكن أكبر بيت في نجع حمادي.
كنت أقعد أنا وأبويا تحتها الساعة حداثر بليل، نسمع الست في
الراديو ونعمل كوبايتين شاي ع السبرتاية..
هي نفسها السبرتاية اللي أمي ماتت وهي قاعدة قدامها.. بس
كانت ساعتها بتعمل يبجي خمستاشر كوباية شاي للحمالين اللي
بيقطعوا القصب ويربطوه عشان يحملوه على ظهر «خليل»..
أيامها صحاب البيت كان عندهم جمل واحد.. أنا اللي سميته
«خليل»، عشان كان بيمشي يخلخل الأرض من تحته..
كان يقف في الحوش، يدخل راسه جوه بلكونتها ويتفرج عليها
طول الليل وهي قاعدة تذاكر.. بس هي عمرها ما حبته أكثر
مني، كانت بتقرف تطبطب على دماغه،
بتقرف أو بتخاف مش فارقة كثير..

أمي زمان كانت تطلع فوق التبة، تلبس ٣ جلابيات فوق بعض
وتقرف لحد ما تجيلها الحزقة.. أبويا مكنش بيرضى يقربلها لحد
ما تخلص منها العادة..
بس أنا كنت دايماً بنام تحت رجليها..
عرفت ازاي!
الأوضة الضيقة حيطانها فضّاحة..

لما كانت بتخلص امتحانات كانت بترمي الكرايس كلها من
البلكونة.. كنا بنلاقي الورق الأبيض بيرُخ علينا زي المطرة.. ألهم
وأطلع فوق ظهر خليل أستهجي الحروف..

ساعات مكنش بيرضى، كان بيرفضني.. أقوم واخدة الورق كله
وطالعة ع التبة، أفكر أُمي وأقعد أبكي لحد ما عنيا تحرقني..

لما كانت بتستعصى عليا كلمة كنت بسألها.. -ست البيت
الصغيرة-..

كانوا دايمًا يندهولها كدة..

وهي كانت دايمًا تجاوبني، بس عمري ما حسيت معاها إني فاتن
حمامة في دعاء الكروان..

أنا اسمي «سما» مش «آمنة»..

أُمي اللي سمتني..

بس نسيت تقولي أطولها إزاي!

الظابط ممدوح حلو.. بس صايح.. أنا شفته بيصور واحدة عريانة
مع زميله جوه زراعات القصب!

كان لازم أقول لست البيت الكبيرة عشان متجوزوش الست
الصغيرة.. وكان لازم برضك أقول لأهل البلد عشان يزفوه.
مكنتش أعرف إنه هيموت في إديهم.

وايه يعني لما الست تبكي يومين!

وايه يعني لما يموت! مَنا أُمي ماتت من غير ما تقول..

وايه يعني لما أعيش طول عمري أسمع الفيلم ومبكيش على
«هنادي»!

أنا مبحبش ست البيت اللي في البلکونة،

ولا أبويا..

ولا خليل..

بحب الديك «محفوظ» وهو بينقر طول الليل في خشب السرير...

بَعْتَرَة مَطْرُ

- «مش ساعات بتحسي إن نفسك الدنيا تَطَر جواكي؟؟»
قالهالي وعنيه مركزة على إيدي وهي بتقلب بسرعة السكر مع
النسكافيه، في الماچ الأبيض اللي مرسوم على طرفه فرع شجرة.
كانت أول مرة أروح فيها «سان جيوفاني»، وأول مرة تبقى كل حاجة
مضبوطة أوي كدة. النجف نوره أصفر وقريب من الترابيزات اللي
مفارشها كاروهات أبيض x أزرق زي أفلام زمان، على كل ترابيزة
قرنفلاية خضرا ريحتها حلوة. حتى عمرو دياب اللي صوته كان
مالي المكان خلينا الذي جي مان يغيره ويحط اسطوانة لفيروز..
- «إديكي موجعتكيش؟»

- «وجعتني.»

- «طب ليه بتعملي كدة؟؟»

- «علشان لو النسكافيه طلع من غير وش هشربه وأنا متعكننة.»

ساعتها بصلي وضحك،»

والقطة اللي خبطتلي على الإزاز اللي بي فصلنا عن البحر قالتلي
إنها فرحانة علشان صحيت الصبح لقت بيضة حمامة جمب
رجليها الشمال.

زمان اتغظت من «ريم» صحبتي اللي كنت بلعب معاها حجلة
فوق سطوح بيتهم اللي أكبر من سطوح بيتنا، لما ورتني بيضة
الحمامة اللي كانت مخيياها جوه خرم مدور في قالب طوب
أحمر كان محاوط برج الحمام اللي عندهم. ساعتها لقتها بتهش
حمامة وعاززة تبعدها عن الباقيين ولما سألتها ليه؟ قالتلي أصلها

حمامة خاينة، سابت صاحبها وجتلنا ولو سبناها هتعلم حمامنا
الخيانة.

مش عارفة ليه يومها حسيت إن نفسي الدنيا تمطر جوايا.

لما رَوَحنا البيت وفتحنا الدرج الي كنا بنخبي فيه الشوكولاتات
واللبان والورد الناشف والجوابات القديمة، مسكنا شوكولاتاية
وقسمناها نصين، وكل واحد أَكَل النص بتاعه للتاني، فجأة لقينا
نفسنا بنصغر وبنتحول لأقزام جوه الدرج، ساعتها مخفناش
بالعكس،

ده احنا طلبنا من الراجل العجوز الي كان نايم تحت السرير إنه
يطلع ويقفل علينا الدرج ويكَمِّل نوم..

لما قفله والدنيا ضلمت فضلنا ماشيين جواه ندور على طاقة نور
كنا بنشيلها في جيوبنا زمان.
ملاقيناهاش.

من يومها واحنا مبنحبش الحمام، وكل ما السما تغيم بنجري
عالشارع نفتحله دراعاتنا، ونتحايل على الدنيا تمطر جوانا...

“فوز”^٥

فدان قصب ضارب في قلب الحيشان..
بامية قصب حواليه مزروعة في الدرايس^(١)،
جانية واتنين وتلاتة..
أرض عفية زي صاحبها!
ريحة فروعها،
رجليها قوالب الشمع طَّله من بين الزرع،
كعب عالي وعريض، وحجل فضة بسرافيل^(٢)..
«فوز» الي بتاجر حتى في التراب!
بترهن للناس الذهب والفضة وتأجر فدانها بالقراريط..
يوم ما رهنّت دكان «أماثل» كانت لابسة المنديل الي غزلتهولها
بسنانة^(٣) على باب دكانها..
صحيت الصبح، كوّرت المنديل من قدام، دَبّت الكحل في عنيتها ودلقت
إزازة الريحة كلها على صدر جلايتها المفتوح..
الورد الي على الجلابية.. كشكشة وسطها وشخللة أساورها..
«جبرائيل» معدي بيطوح..
الناس بتتفرج من ورا الباب المتوارب..
وابن «فوز».. راجع من طاحونة عم «مَلقي» يخطي وميهتمش.. جنب
شوال السمسم المدلوق..

(١) حزام بيحوط أحواض زرع القصب.

(٢) خلخال بجنيهاة فضة.

(٣) إبرة كروشيه.

والناحية الثانية من الدكان،
شجر كافور ونخل عالي وبلح أصفر على الجنين..
وطاحونة..
تتلم قدامها الحريم بالمقاطف،
تستنى القمح خارج دقيق تحت الجادوس*^(١)،

وطواير ماشية للفرن..
طواير تانية لعصارة القصب..
حزن «أماثل»!
وخطوة «فوز» وهي خارجة من الدكان..
كَبْ كَبْ كَبْ...

(١) "الجادوس" هو آخر جزء في الطاحونة يخرج منه الدرة والقمح المطحون.

أحلى الأوقات- "سيرة بنات"

امبارح افكرتك..

لما الفيلم اللي بتحببه جه على «روتانا سينما» افكرتك.. وافكرت شكل ضحكنا القديمة..

«أحلى الأوقات»..

لما شفناه في السينما أول مرة كلهم كانوا بيضحكوا.. وانتي الوحيدة اللي كنتي بتعيطي، ساعتها «سالي» اتريقت عليكي.. وبعدها، بقت هي كمان تعيط كل ما تشوفه..

افكرت كمان سهرنا في البلكونة لحد الفجر.. نرغي، ونحذف على الناس أكياس مليانة ميه وضحكة بعرض الشارع، كنا مؤذيين بجد..

ولما سافرنا «بور سعيد» في شم النسيم، كانت أول مرة تاكلي فيها من عربية في الشارع.. وأول مرة نشوف بلد مليانة بلالين ملونة كدة!

قبل ما نركب القطر،

نزلنا شربنا عصير قصب من محل قدام محطة رمسيس. ملاقينا ش تذاكر كالعادة «فاطوقنا».. بس «فيروز» كانت عاملة حسابها، اشترت جرنان ولب وفول سوداني.. الجرنان قرت نُصه، وفرشت النص التاني علشان نقعد عليه احنا الأربعة في ركن صغير بين العرييات.. وشنا في وش بعض، ورجلينا فوق بعض.. ساعتها «هالة» كانت قرفانة تقعد..

انتو اشعرفكم الناس عاملة ايه على الأرض!!؟
فيروز ردت: كل ما هو جaaaaااف طاهر..

يومها مكالناش غير لب وفول سوداني..
وعشان انتي طول عمرك مبتعرفيش تقزقي اللب، «فيروز» كانت
بتقشرهولك وتحطه على حجر.. ابتسمتي..
«سالي» فضلت ساكتة طول الطريق ولما سألتوها مالك؟
كسّلت ترد..

مش عارفة اشمعنة افكرت الأيام دي دلوقتي!! يمكن علشان
محتاجالكم.. ويمكن علشان محتاجة لأيام شبهها.

عارفة نفسي في ايه؟؟
نفسى نطلع في يوم على البحر الساعة سبعة الصبح.. نتمشى
على الكورنيش ونفطر فول وفلافل من عند «جاد».. متسألنيش
اشمعنة جاد.. يمكن بيفكرني بأول واحد حبيته.. أول واحد شفت
في عنيه اسكندرية..
تفتكري ممكن؟؟

أنا مفتكرش.. لأن ساعتها «فيروز» هتكون مشغولة في المطبخ، بتبل
لجوزها الفراخ الي كانت بتعملهاالكو.. و«سالي» هتكون نائمة،
ولما تصحوها هتقولكو مش قادرة خلوها يوم تاني.. أما «هالة»،
هتقف ساعتين تتمكيج قدام المراية والآخر هتخنق وتغير رأيها

وهدومها..

وانتي.. انتي هتكوني خلفتي عيال قد الصراير ومحتاسة بيهم،
زي ما طول عمرك بتحتاسي بأي حاجة صغيرة..
بس المشكلة مش في كدة.. ولا في إن عمركم ما هتركبوا القطر
ما بعض تاني.. أو في إن «روتانا سينما» عمرها ما هتبطل تجيب
الفيلم ده.. المشكلة الي بجد، إنك عارفة كويس إن كل واحدة
فيكم عمرها ما هتبقى مبسوفة..
قد ما اتبسطت زمان...

”مادلين“

تلات ببيان..
مرصوين بالطول على درب مش متسفلت..
سُقَاطة على كل باب..
بيت كبير متقسم على تلات اخوان.. بلكونته بتراسينا، كأنه طالع من
كتاب التاريخ..

وخالتي «لَمِيعَة» أم «مادلين»..
مرات عم «نُصحي»، اللي عنده دكان ع النيل،
أخو «مَلقي بسادة» و «صدقي بسادة»،
واقفة انهاردة في ظهر العروسة،
ترقّع روحها المجروحة، وتخيّط الطرحة في الهوا في كُم بدلة العريس..

خالتي «لَمِيعَة» اللي مبكتش يوم ما غابت الخطيفة..
قبل السنة بستتين..
حطّت كفوفها في الطين،
ولبخة على دماغها ربطت فوقها عمامة،

خمسة،
عدد العيال اللي شالتهم بطنها..
وعدد الأيام اللي ربطت عليها حجر بملاية عشان متاكلش..
خمس تيام..

وقفت «لميعة» تندب بإيديها بنتها اللي خطفها الطوّاب*^(١)..

«عبد الخالق» الطوّاب..

قالوا عليه فقر على نفسه وع اللي حواليه!

يا ترى يا «عبد» عرفت تكسر الطوب على دماغ الفقر؟

يمكن!

الأكيد إنه حاول.

والأكيد إن تلت البيت الكبير كان فيه أوض تساع عم «نّصحي» والخالة

«لميعة» وأربع عيال..

أربع أوض شائلة ريحة «ادوارد» و«فاكهة» و«أنور» و«عايدة».. أربعة

بس!

«مادلين» من يوم ما شافت نور الدنيا وهي بتنام في حضن أمها..

ولما عبد الخالق جرب يناغش خشب التراسينا، من دون البنات ناغش

«مادلين»..

قالوا عليها خليفة المسلم اللي معرفش ربه..

لكن الحقيقة!

الحقيقة اللي كانت هتضيع مع العمر لولا الغريب اللي حكاها..

إنها:

ركبت معاه عربية أجرة.

خدها لوكاندة في بلد بعد بلدهم ببلدين..

عنيه الواسعة..

(١) الشخص اللي بيصنع الطوب.

حضنه اللي مَلَمسهاش!
البت عشقت الولد،
والولد طلع عايز فلوس.

والحقيقة:

إن «ادوارد» اتجوز أخت جرجس بنت عمه الدميمة، علشان يحمي
سيرة الخطيفة..

والحقيقة:

إن مادلين فرحها انهارة على «جرجس».. يمكن تجبر بستر الفضيحة
قلبها الملوّجوع.

والحقيقة:

هي اللي هتخلي الطوّاب يموت مسموم في قلب داره..
و«ادوارد» لحد آخر عمره..

يمشي مكشّر في قلب الشارع...

حِكَايَةُ الْقَفْرِيتِ

وكأني صعلوك قديم متداري في تلفيعة شيخ، وكل شيخ وله طريقة،
وأنا طريقتي أتعلق باللي مبيحيش..
عفريت يهودي صاحب جدي من سنين. قابله وسط محصول
القصب وحلف ليصاحب عيال عياله..

ساحر عراقي ساكن في شارع الهناجرة. كنت يومها عيل صغير
متشعلق في دراع جدي، دراعه مسنود على راس عصاية، والعصاية
غارسه بعزم ما فيها في قلب التراب..
جدي سألّه ازاى يطلع الكنز المدفون تحت بيته؟
«تسعة وأربعين جنيه ذهب، حُطهم في صُرة مربوطة وارميها في
النيل»

بخور.. ديل الستارة.. البيت بيولع.. شوار «مِشمش» بيتحرق..
جدي لسه بيدور ع الكنز!
الساحر كتب طلاسّم على ايده.. فضل يتعرّش لحد ما وقع من
طوله..

وكأني كعروب متعلق بجلابية «رعراعة».. مستني خلخالها يلمس
الحثة الساقعة اللي جوايا وهي بتلم الكعاريب من الغيط..
يناغشها، ويديها على قد نيتها..
ونيتها خير، بس الود مرضيش يلمسني أو حتى يهوشني من
بعيد..

أول مرة سمعته كان في الحمام، إداني شلوت لقيت نفسي مقرفص
في الركن..

من يومها مرضيش يفارقني.
جدي ورثني الهم وعفريته يا «رعراعة»!

شيخ جابينله شيخ.. يقرأ ع العسل ويرقيه..
إداني برطمان أكلت منه. حط طرحة على راسي وقرا سورة الجن
كلها.

أنا كنت بترعش زي جدي بالضبط!
كتبلي حجاب بحبر أحمر، دوبه في الميّه وحماني بيها..
قلتله متسبنيش لوحدي في الحمام، شديته من جلابيته.. وقع.
دماغه اتخبطت في رجل الحوض.

خيظ الدم بيجري عليّ..
حد تاني اللي كان بيكب الميّه على دماغي يا «رعراعة»..
وأنا كنت بترعش.. أترعش..
زي مولود حطوه في التلج...

بِتَابِي...

«كان فيه مرة ايه؟ خنفسة..
راحت قالت لمامتها ايه؟ عايزة آكل كفتة..
مامتها قالتلها روعي تحت ترابيزة السلطان واستني حد يقع
منه كفتة..
فضلت ماشية ماشية ماشية.....»

بِت بتي حبستني في العشة.. لما دخلتُ أخط للفراخ قشر البطيخ
والميّه سهتني وقفلت الترباس.. قولتلها افتحي يا زينة البنات..
وقفت تضحك..
راسي خبطت في سقف العشة الخشب، زهري المحني وجعني،
افتكرت بناقي الي سافروا..
«زينة» بتضحك.. قعدتُ ع الأرض جنب السمانة السودا.. عيطت..
«افتحي يا زينة البنات»..
معرفتش تفتح الترباس.
وقفت بره تعيط وأنا أعيط..
أنا أعيط وهي تعيط..

«فضّلت ماشية ماشية ماشية.. شافت مين؟
شافت الفيل. الفيل قالها ايه؟

يا خنفسة يا ست النساء، تتجوزيني وأجيبك كِسا؟
قالتله هات مهر في كُمي وأنا أروح أول لأمي.....

خط الدقيق كل مرة عارف سَكته.. بين أوضة الخبز وأوضة
الأشكيف..

كل مرة تخطف المنخل من عَ الطبلية وتجري، وأنا أجري وراها..
قدام الحوض القصير كنت بغسل المواعين وأحكيها حواديت:
«حدوتة ظَبْنَا وكَلْنَا»، «حدوتة الديب والسبع معيز»، «حدوتة
الخنفسة ست النساء»...

كان عندها دولاب مشمع أبوها جايهولها من «الكويت».. كل يوم
تفضي كل هدومها ع الأرض ونرصهم من أول وجديد..

«مامتها قالتلها الفيل ده كبير خالص وتخين خالص مش هينفع
تتجوزيه....

بِت بتي وشها طبق ورد، كانت بتحب تاكل وهي واقفة ع
الكرسي اللي جمب سور البلكونة، تبص بجنبها على الشارع..
زهرها للعيون اللي طلّ من ورا الشُراعات..

«فضلت ماشية ماشية ماشية شافت مين؟ شافت الحصان..
الحصان قالها ايه؟

يا خنفسة يا ست النساء، تتجوزيني وأجيبك كِسا؟ قالتله هات
مهر في كُمي وأنا أروح لأمي.....

بِتِ بَتي أمانة..
تاهت مني في سوق السمك، كنت بنقي البوري من القفة، لفيت
ورايا ملقيتهاش! رجليا ماشليتنيش..
ولاد الحلال لقوها آخر السوق بتتفرج ع المنخلول و«سمارة»
الخرسا..
خدتها في حضني وقعدتْ أعيط.. وهي تعيط..
أنا أعيط وهي تعيط..

«مامتها قالتلها الحصان ده طويل خالص، وعنيه أوسع من عنيكي،
مينفعش تتجوزيه...»

لما كملت ٣ سنين أبوها وأمها خدوها عشان تسافر وتخش
المدرسة.

«فضلت ماشية ماشية ماشية لحد ما شافت مين؟ شافت الجعران..
الجعران قالها يا خنفسة يا ست النسا تتجوزيني وأجيبك كِسا؟
قالتله هات مهر في كمي وأنا اروح لأمي.. مامتها وافقت، وراحوا
تحت ترابيزة السلطان وأكلوا كفتة وعاشوا في تبات ونبات»

شدوها من حضني ع السلم. غضبت على بَتي وجوزها سنة
باتناشر شهر.
«زينة» هي الونس.
الشنط متحملة فوق العربية..

شاورتلي وهي بتركب..
كانت بتعيط..
العريية بتبعد..
وأنا بعيط...

حكاية البنت اللي عندها شامة في قلبها..
والولد اللي في كفه اتناشر حسنة

وكأنها عرق خشب ماشي عكس اتجاهه..
وكأنه اتخلق علشان يشيل الصوف الميت من على كُم جاكته
قديمة!

الغريب.. انهم متقابلوش فوق ظهر السفينة الي كل واحد فيهم
كان واقف في طرفها.

الولد الي عنده اتناشر حسنة في كفه الشمال كان معلق كاميرا في
رقبته وراكب البحر يدور على وش الدنيا الحلو فوق ظهر سفينة
بتلف الموالي..

البت الي عندها شامة كبيرة في قلبها كانت متشعلقة في سور
السفينة، بتتفرج ع البحر وتحكي لصاحبها إنها بتنطفي.. وتحكيها
عن «ذات»^(١)، بالذات اللقطة الي بصت فيها في مراية الحمام
وقالت «وأنا مين يجددني؟».. واللقطة الي جربت فيها نضارة
كانت لايقة عليها من سنين..
واللقطة الي المفروض صاحبها ياخذو فيها الكورنيش بطوله وهي
محتارة:

هي فعلا نفسها تكون شبه الي بتتمشى معاهم؟

(١) مسلسل تلفزيوني عن رواية «ذات» للكاتب صنع الله إبراهيم.

هي شيفاهم مش مطفيين زيها؟؟

وكان الحل إنها تعيش لوحدها، في بيت مدهونة حيطانه بالبيتيتي،
الدهان متقشر كأنه من زمان، بس هو مش كدة.. متعلق عليها
براويز لصور قديمة (أم كلثوم، فاتن حمامة، عبد الوهاب، المراكبية
في أسوان، أنور وجدي، ترام الرمل القديم،.....الملكة فريدة)
كلها بالأبيض والأسود لكنها لسه مطبوعة أول امبارح..
المرايات إطارها فضة بس اللعة الزيادة بتفضحها.. والنجف
نحاس بس مش من خان الخليلي..
نور أصفر.. ديكورات أصيلة لمطعم مصري في بلد بعيدة...

حل تاني: إنها تسيب كل حاجة وراها وتركب البحر تدور على
فرصة تمثيل.. فرصة علشان تاخد المسرح جري بطوله لحد ما
تنهج، كل النهجان اللي المفروض كانت تنهجه من سنين..

بس الولد والبنت متقابلوش على ظهر السفينة!
بعد ما لفوا مواني البحر الأبيض كلها
رجعوا اسكندرية،
واتقابلوا في الشارع الضيق اللي بيطلع على «كوم الدكة»..
بعد السلام..
مغارة الألوان...

البيت القديم قصاد البيت القديم..

في الشارع الضيق بيتها كان نسخة من حلمها..
أما بيته فكان مليان برطمانات إزاز..
صوت محمد فوزي، وريحة السكر والفاكهة المطبوخة بيتسربوا
من شباكه في نص الليل..

الولد الي عنده اتناشر حسنة في كفه الشمال كان ييحب يطبخ
المربي البيتي ويعيبيها في برطمانات يوزعها على الصحاب والجيران..
توت، فراولة، مشمش.. جزر أحمر، برقوق وبرتقان...

لما شاف البنت لأول مرة مكانش فاهم ايه الي بيربطه بيها
بالظبط!
الشامة؟

ولا المزيكا الي بتلعبها بخطوتها وهي طالعة سلام الشارع،
ولا ريحة فص البرتقان الممصوح جوه قلبها!

البنت الي عندها شامة كبيرة في قلبها كانت محتارة ازاى ترجع
للولد برطماناته بعد ما كلت كل المربي الي جواها..
بصت لصورة جدتها المتعلقة ع الحيطه، افتكرت أول حبة زتون
داقتها من اديها..
رصت الخضار على الرخام الناعم.. جمب الخل والتوم والزيت
والملاح..

عملت كل أصناف المخلل الي اتعلمتها من جدتها وهي صغيرة:
لمون بالعصفر، فجل أحمر، لارنج بالملاح، زتون بحبة البركة....

كأنها كانت بتشرب الحزن مع الميه..
الستارة لما تنسى تفتحها بالأساييع..
الفازلين لما يبطل يجيب نتيجة مع جلد الكعب المتشقق..
ولمعة الروح.. وهي بتنطفي منها بشويش بشويش..

قبل ما تقابله على ناصية شارع فؤاد، كفها حاضن الاتناشر
حسنة في كفه..
وهو بيبوس الشامة الي في قلبها ويزرع جمبها شجرة برتقان...

الفهرس

١١	طبق الحنة.....
١٥	تحت السرير.....
١٩	نوتة زرقا.....
٢٥	حكاية الولد أبو ودان صغيرة والبنت الي قلبها مليون حواديت.....
٣١	عم إبراهيم.....
٣٥	الرحمة.....
٣٩	عُمر الخيام.....
٤٥	دار الهنا.....
٥١	فرشة «أم صباح».....
٥٧	سلم خشب.....
٦٣	سَما.....
٦٩	بعثرة مطر.....
٧٣	فوز.....
٧٧	أحلى الأوقات.....
٨٣	مادلين.....
٨٩	حكاية العفريت.....
٩٤	بِت بتي.....
	حكاية البنت الي عندها شامة في قلبها.. والولد الي في كَفه
٩٩	اتناشر حسنة.....

CD

- أداء صوتي:

زينب فرحات

كريم أبوكيلة

إيناس حلیم

- عازفين:

عود: أدهم الحبشي

ناي وكلارنيت: أحمد ممتاز

كمان: أندرو عاطف

كيبورد ومؤثرات صوتية: بيتر ملاك

- هندسة صوت ومكساج:

سمير نبيل

عمرو شاهين

- تنسيق وتوزيع موسيقي:

كريم أبو ريذة

الكاتبة

*إيناس حليم كاتبة سكندرية من مواليد يوليو ١٩٨٣ ، حاصلة على بكالوريوس هندسة قسم الهندسة المدنية.
*حصلت على جوائز في القصة القصيرة من ساقية الصاوي ومركز طلعت حرب.

*نشر لها قصص ومقالات في جرائد ومجلات ورقية وإلكترونية.
*صدر لها:

- «يحدث صباحًا» مجموعة قصصية عن الهيئة العامة للكتاب- سلسلة كتابات جديدة، القاهرة ٢٠١٣.

- «أحبني لتعرف من أنا» مجموعة قصصية عن دار المصري للنشر والتوزيع، القاهرة ٢٠١٠.

*تم مشروع «تحت السرير» بمنحة من مؤسسة المورد الثقافي- مجال الأدب، دورة مارس/ أذار ٢٠١٣.

*للتواصل مع الكاتبة:

Enashaleem83@gmail.com

بتكتب رواية أو قصص أو مقال ..
بالفصحى , بالعامية أو حتى بالإنجليزية ..
بتحب تكتب , أو تعرف حد بيحب يكتب , كلمنا ..
هنعمل كل اللى نقدر عليه عشان نساعدك تحقق حلمك وتكون
كاتب معروف ..
لأن في كيان , للإبداع مكان ..

اتصل بينا على :
محمول: 01005248794 – 01001872290 – أرضي: 0235688678
www.kayanpublishing.com

وابعتلنا على :
info@kayanpublishing.com

وتابعنا :
كيان للنشر والتوزيع
www.Facebook.com/kayan.publish
[Twitter.com/kayanpublishing](https://twitter.com/kayanpublishing)
www.pinterest.com/kayanpublishing
[instagram.com/kayan_publishing](https://www.instagram.com/kayan_publishing)